

Navrae
Enquiries
IMibuzo
AJ van Niekerk

Telefoon
Telephone
IFoni
(021) 467-2543

Faks
Fax
IFeksi
(021) 461-3656

Verwysing
Reference
ISalathiso
13/12/2/B



Wes-Kaap Onderwysdepartement

Western Cape Education Department

ISebe leMfundo leNtshona Koloni

Omsendbrief 0027/2001

AAN:

HOOFDIREKTEURE, DIREKTEURE, AREA- EN KRINGBESTUURDERS, PRINSIPALE EN VOORSITTERS VAN BEHEERLIIGGAME VAN GEWONE OPENBARE- EN OLSO-SKOLE

**UDITEURE VAN SKOLE AANGESTEL INGEVOLGE ARTIKEL 43 VAN DIE SUID-
AFRIKAANSE SKOLEWET, 1996 (WET 84 VAN 1996)**

1. Die finansiële jaarstate vir 1999 toon 'n behoefte aan riglyne rakende die aanstelling en funksies van ouditeure aangestel ingevolge Artikel 43 van die Skolewet.
2. Subartikel 3 van Artikel 43 bepaal dat 'n skool se ouditeur nie 'n finansiële belang in die sake van daardie skool mag hê nie. Dit beteken, onder andere, dat die ouditeur nie direk of indirek inkomste of toelae of voorskotte van die skool mag ontvang nie. 'n Personeelid van 'n skool (hetsy deur die staat of deur die beheerliggaam aangestel) of enige nabye familielid van 'n personeelid van die skool mag byvoorbeeld nie as ouditeur van daardie skool se finansiële sake aangestel word nie. 'n Persoon wat op enige manier handel dryf met die skool, of 'n lid van sodanige persoon se gesin mag ook nie as ouditeur van die skool aangestel word nie.
3. Dit gaan in artikel 43(3) daaroor dat ouditeure in 'n posisie moet wees om hul werk onafhanklik te verrig, sonder dat persoonlike finansiële oorwegings hul oordeel beïnvloed. Indien daar enige rede is om te glo dat die ouditeur se oordeel deur eiebelang beïnvloed mag word, moet so 'n persoon nie aangestel word nie.
4. Die ouditeur tree namens die ouergemeenskap op. Alhoewel die ouditeur deur die beheerliggaam aangestel en betaal word, neem hy of sy nie opdragte van die beheerliggaam of van die prinsipaal nie. Die ouditeur se verslag, wat deel vorm van die skool se finansiële state, is 'n verslag aan die ouers en aan die onderwysdepartement, net soos die verslag van die ouditeur van 'n maatskappy bedoel is vir die aandeelhouers. In die eerste plek moet die ouditeur aandui of die finansiële state na sy of haar mening 'n redelike weergawe is van sake, byvoorbeeld of


- die skool se boekhoudingstelsels en kontrolemaatreëls behoorlik nagesien is.
 - al die inkomste in die finansiële state aangetoon word.
 - al die uitgawes wat in die state aangetoon word, gemagtig is.
 - al die skool se bates en laste in die jaarstate weergegee is.
 - die items in die jaarstate redelik korrek geklassifiseer is.
5. Indien daar tekortkominge in die finansiële jaarstate is, moet die ouditeur dit in sy auditverslag uitwys. Indien inkomste wat die skool toekom, byvoorbeeld in 'n trust inbetaal is, of indien bates wanaangewend is, moet die verslag dit aandui.
6. Indien 'n ouditeur wesentliche onreëlmatigheid in die bestuur van die skool se finansies ontdek, moet dit onverwyld gerapporteer word aan die Wes-Kaap Onderwysdepartement (WKOD) se Direkteur: Rekeningkundige Dienste. Wesentliche onreëlmatighede kom voor waar daar nalatigheid, onbevoegdheid of oneerlikheid in die bestuur van die skool is, wat kan lei tot 'n groot finansiële verlies vir die skool. (d.i. 'n verlies wat groot is in verhouding tot die skool se finansiële vermoë).
7. Artikel 43 bepaal dat die ouditeur verkieslik 'n geregistreerde ouditeur moet wees. Die WKOD se benadering is dat daar, behalwe in uitsonderlike gevalle, nie van hierdie reël afgewyk moet word nie. Alle persone wat kwalifiseer as rekeningkundige beamptes van beslote korporasies en geregistreer is by een van die instansies wat hieronder genoem word, word beskou as geregistreerde rekenmeesters.
- i) Die Suid-Afrikaanse Instituut vir Geoktrooieerde Rekenmeesters.
 - ii) Rekenmeesters en ouditeure geregistreer kragtens die Wet op Openbare Rekenmeesters en Ouditeure, 1991 (Wet no. 80 van 1991).
 - iii) Die Suid-Afrikaanse Instituut van Geoktrooieerde Sekretarisse en Rekenmeesters.
 - iv) Die Instituut vir Koste- en Bestuursrekenmeesters.
 - v) Die Assosiasie van Kommersiële en Finansiële Tegnikusse van Suid-Afrika.
 - vi) Die Instituut vir Administrasie en Handel van Suid-Afrika - lede wat Maatskappysekretarisse is of wat die Diploma in Rekeningkunde of die Diploma in Koste- en Bestuursrekeningkunde geslaag het.
 - vii) Senior lede van die Suid-Afrikaanse Instituut vir Besigheidsrekenmeesters.
8. Ouditeure moet bekend wees met die handleiding wat die Wes-Kaap Onderwysdepartement uitgereik het met voorskrifte oor hoe die finansies van skole geadministreer moet word. Beheerliggame word versoek om dit vir die ouditeur beskikbaar te stel by sy/haar aanstelling.

9. Elke skool word versoek om die volgende besonderhede te verkry vanaf die ouditeur wat vir die skool aangestel is en dit voor of op 12 April 2001 aan die Direkteur: Rekeningkundige Dienste te besorg.
- Name van ouditeur(e)
 - Adres(se)
 - Telefoonnommer(s)
 - Faksnommer(s)
 - Kwalifikasies en/of professionele liggaam waarby geregistreer
 - Enige vorm van betrokkenheid by die skool wat die ouditeur se onafhanklikheid mag beïnvloed.
 - Of die ouditeur advies, toeligting of opleiding vanaf die WKOD verlang
10. Wanneer 'n skool se ouditeur aangestel word, moet die beheerliggaam aan hom of haar 'n afskrif van hierdie omsendbrief verskaf.
11. Enige kommentaar wat u wil lewer oor die inhoud van hierdie omsendbrief sal waardeer word. Dit kan gerig word aan:

Die Hoof : Onderwys

Vir aandag: Direkteur: Rekeningkundige Dienste
 Wes-Kaap Onderwysdepartement
 Privaatsak X9114
 KAAPSTAD
 8001
 Faks Nr. (021) 461 3656

12. Dankie vir u samewerking.


 HOOF: ONDERWYS
 DATUM: 12 Maart 2001